

Dörfleischter 2001

Velo, Kickboard, Trottinett,
Händy, Skates und Internet,
Grossvater u Grosi finge's der Wahn,
U freese ume im ne Affezahn,
Sogar bi de unverdorbne Nonne,
Erzügt e Scooter e grossi Wonne,
Ou de Chlynschte tuet me scho Redli choufe,
Bevor si überhaupt scho sälber chöi loufe,
Aui si vo däm Mobil-Wahn besässe,
Hei die äch z' viu Rindfleisch grässe !

Nüt Nöis bi de Bieler Gmeinratswähle,
Wäge däm lyde mir wieder Höllequale,
Witeri vier Johr die glyche Gringe gseh,
Uf Bärndütsch gseit: „ça nous fait chier“
Mir hätt vo dene Joggle gärn öppis gsunge,
Hei aber eifach nüt Schlaus zämebrunge !

Schlussändlech hei si's düregschiert,
Ds Kongrässhuus wird jetz glych saniert,
Statt dass me sech jetz dry tuet schicke,
Die Hütte einisch richtig z' flicke,
Wär üse Vorschlag – ohni z' gränne,
Ganz eifach: bohre, lade, spränge !

A Zurich les staufifres nous mettent en colère,
En choisissant la première langue étrangère,
L' anglais avant le français – ce n'est pas charmant,
Quoiqu' ils savent même pas parler l'allemand,
C'est vrai, dit notre copain Georges de Morges,
Ce patoit zurichois est comme une maladie de gorge !

Isch das es Loch oder isch's e keis
Wart, i gloube do isch ou no eis,
Äs isch kei Zahnarzt, wo tuet kontrolliere,
Öb me d' Schnurre vom Kari sött saniere,
So geit's zue – mir wei euch nümme wyter quäle,
Wenn d' Yankees probiere e Präsi z' wähle !

Für e Ogi us em Bärner Oberland,
Chunnt jetz der Sämi us em Seeland,
Mir Geischer finge das huereguet,
Dass kei Zürischnurre a däm Platz hocke tuet,
Der Dölf, dä tuet sech jetz verloche,
U ds Kanderstätg sini Eier choche !

Ei Poscht nach der angere geit jetz zue,
Mir Geischer finge: Jetz isch gnue !
Üs loot das Verhaute eifach kei Rueh,
Ds Prys-Leischtigs-Verhältnis passt i kei Chue,
Drum loset guet, was mir hie singe,
Am beschte tüet dir d' Briefe sälber bringe !

Ine – use – ine – use
Wär tuet äch hüt mit wäm zäme pfuuse ?
U wär blybt äch am längschte drinn ?
U wär git wäm äch ufe Gring ?
Das Big Brother finge mir zum gränne,
Dä Container sött me – bohre, lade, spränge !